

寶眞齋法書贊

二



贊書法齋眞寶

(二)

撰 珂 岳

寶眞齋法書贊卷十

宋名人眞蹟

蘇舜欽草書四詩帖二十行

寄陸同年

忽憶前年科第後。此時鷄鶴整同羣。秋風惆悵忽吹散。鷄在中庭鶴在雲。
楚天

楚天遙望每長嘯。宋玉襄王盡作塵。不作瑤姬歌入夢。更爲雲雨待何人。

觀煬帝寶帳

漢文窮相作前王。慳惜明珠不斗量。翡翠蛟綃何所直。千裨萬補上書囊。
春晚

紛紛從此見花殘。已覺長繩繫日難。樓上有愁春不淺。小桃風雨凭闌干。

右慶歷湖州長史滄浪先生蘇公舜欽字子美草書白樂天等四詩一卷。予嘗觀先生草聖代懷素作首篇如出一手筆妙如此。得其緒餘。豈不足以名一世乎。滄浪蓋蘇州亭名。亦先生自稱。予得此詩于寶慶乙酉七月丙子年月日時皆水。與滄浪之名若合符節云。

贊曰。滄浪之存乎蘇。智者是居。夫豈知後二百載。予得茲帖。而歲月日時之偶符。先生濯孺子之纓。而

予乃驅祁山之車。蓋已判然其兩塗。心之同。跡之殊。庶幾乎知書。

邵餗篆歸去來辭帖

界行紙。上書。二十二行。

歸去來兮。田園將蕪。胡不歸。既自以心爲形役。奚惆悵而獨悲。悟已往之不諫。知來者之可追。實迷途其未遠。覺今是而昨非。舟搖搖以輕颺。風飄飄而吹衣。問征夫以前路。恨晨光之熹微。乃瞻衡宇。載欣載奔。僮僕歡迎。稚子候門。三徑就荒。松菊猶存。攜幼入室。有酒盈罇。引壺觴以自酌。眄庭柯以怡顏。倚南牕以寄傲。審容膝之易安。園日涉以成趣。門雖設而常關。策扶老以流憩。時矯首而游觀。雲無心以出岫。鳥倦飛而知還。景翳翳以將入。撫孤松而盤桓。歸去來兮。請息交以絕遊。世與我而相違。復駕言以焉求。悅親戚之情話。樂琴書以消憂。農人告余以春及。將有事于西疇。或命巾車。或棹孤舟。既窈窕以尋壑。亦崎嶇而經丘。木欣欣以向榮。泉涓涓而始流。善萬物之得時。感吾生之行休。已矣乎。寓形宇內復幾時。曷不委心任去留。胡爲乎遑遑欲何之。富貴非吾願。帝鄉不可期。懷良辰以孤往。或植杖而耘耔。登東臯以舒嘯。臨清流而賦詩。聊乘化以歸盡。樂夫天命復奚疑。

篆籀之法。難于華漏。而又難于小字。邵公此作。遠過岳陽題署。豈其妙齡精力至到者耶。治平甲辰。子玉見贈。閬鄉驛同書。

余素不嫻書畫。以湖州君之奇之也。余安得不奇之。博陵崔公度識。

兩題並行書。共七行。

元祐六年仲夏晦日。河中司理司馬樞借觀。

會稽孫沔曾觀。

兩題楷書。兩行。

紹聖二年黃符嘗觀錄書一行。

右慶歷隱君冲素處士溪齋先生邵公餽手篆陶靖節歸去來辭一卷篆籀之學自二徐後惟邵氏先生之弟龍圖閣學士餽蓋嘗以石經刻監學名垂當代而先生獨高蹈丘樊終身不仕故書蹟之妙罕傳予嘗聞范文正謫守嚴瀨作客星祠記奉書先生有曰抵桐廬郡有嚴子陵釣臺築堂而祠之又爲之記念非托之以奇則不足傳後今先生篆高出四海或能枉神筆于片石則嚴子之風復千百年未泯於庫亦可想其人矣觀先生此帖意與筆稱自可挹栗里之風于千載之上雖幅楮猶可寶也而況乎孫威敏文與可司馬才仲崔伯易輩之題彪列其後耶彼在同時已盛稱如此又況乎□□□□□□書郎柳瑾子玉家柳以□□□□□□弗復可攷予得之歲□□□十月本出德清李氏之故藏有李氏二印存焉。

贊曰予江人也挹柴桑之風望廬嶽之雲不惟傳蠹編之芸蓋亦接鄉社之枌摹寫淳古發揮隱淪獨並蓄于一齋是豈不足以比乎松菊之存意籀學之天畀使如予者得以附逸軌而瞻絕塵如彼崔公度寄自湖州君亦既託可知于不知是亦審所因于當因予于文正亦云。

宋景文言誌帖楷書七行尾批一行。

祁啓被教已審凡言誌者是藏隧記者是立之墓前故誌備而記略想已周知然不敢不告祁惶恐上咨君玉舍人執事十九日。

張安道所撰五本納上看訖垂示。

右皇祐翰林承旨、宋景文公祁、字子京、言誌帖真蹟一卷、公爲益部、筆蹟多散落蜀中、淳熙丙午五月、先君漕東川、得此手識歲月、云獲于閬才元侍郎家、

贊曰、既有史才、又得墨妙、今古言辭、事功談笑、蜀人之藏、曰維甘棠、我時其傳、以著不忘、

龐莊敏魁柄帖

楷書十行

籍再啓、非的不敢上記、繫託之懇、曷嘗暫忘、每傳諭誨、惟銘刻于中、并誠佳地、藏庇老軀、殊幸、常念當是時、當魁柄、固多憂勞、中外倚賴、披接方遠、切冀保衛、爲廟朝之福、不宜籍再啓、

右皇祐宰相、侍中龐莊敏公籍、字醇之、魁柄帖真蹟一卷、予家舊藏、題云、得之湖湘間、龐氏孫枝之仕于彼者、不復紀歲月、亦有藏書家二印、公輔仁宗、致昇平、德履才實、媲于文富、論勳較績、雖有大小、比之考室、均棟梁之用也、帖中有并誠佳地之語、蓋公自罷相守鄆、繼以節鉞帥并門云、

贊曰、漢有德公天下士、皇祐相國實其裔、雖云出處有同異、今古龐宗開顯晦、我觀清風勵百世、未若太平以身致、鹿門遺墨不可覯、聊寶此書貴行志、

梁莊肅苦熱帖

行書十行

適啓、前日承過訪、殊慰別後之思、苦熱渡江、頗艱阻、尙稽馳謝、方甚企嚮、遽枉手教、兼惠土宜、祇紉勤眷、媿感深矣、就喜動止順裕、尊聞福康、諸眷均慶、赴上有期、未旦夕趨舟次、姑此區區、不宜適啓、志成賢令、年家閣下、十八日、

右皇祐宰相、司空、侍中梁莊肅公適、字仲賢、苦熱帖真蹟一卷、有藏書家二印、仁皇御四海、聖德如天、

瓌材並生。無所不幃。如公之英敏宏達。蓋輔揅之偉人也。而獨未以最稱。信乎思皇多士。所以致以寧之效于一時者。益卓乎其不可及也。帖與杜祁公帖俱。易之京氏。

贊曰。盛世之英宰。固不可以一節議。方其尼朱梁之賞。沮端門之瑞。反四使之命。正皇儀之禮。其勁正如此。則胸中之所存。固足以印其字體。又何必徒取其適美。惟得其物。尙寶此紙。

韓忠獻北道京邑二帖

並楷書各十二行

琦再拜府判祠部。春律尙寒。想惟體候休勝。自承入贊天府。更不領音教。諒京邑浩穰。甚勞餘力也。琦近更守常山。見已在道。于後月初。可到本任。恐知尙賒款晤。切希順時珍愛。不宜。琦再拜。府判祠部左右。正月十六日。

琦啓。近忠彥與王仲保相繼至府。洊辱誨筆。且承勳止清適。不勝感慰。感慰。北道今秋大稔。至于梨棗蕎蔬。無不成熟。農里皆言。一二十年未嘗逢此。但河決許灣東去。壞魏之清平夏津。恩之歷亭。永靜之將陵。滄之臨津。饒安。樂陵。一帶縣鎮田廬。爲害不小。而得恩冀數郡。化爲沃壤。信使道路無患。御河可還故流。利亦多矣。天意豈可測耶。不宜。琦又上。

右三朝相國尙書令。魏國韓忠獻王琦。字稚圭。北道京邑二帖。真蹟一卷。嘉祐治平間。杞天再傾。公手扶重輪。敷曜四極。晦冥以闔。清寧以奠。羣生萬彙。各適其所。勳烈冠彝鼎。聲光流竹帛。社稷宗臣。惟公爲克當之。首帖乃家世珍藏。云先兄吏部甫。自四明假守還朝。時紹熙庚戌。先君實爲左司郎。家庭聚燕。互出名帖。見公真蹟甚多。就拆得之。有藏書家一印。次帖以寶慶乙酉正月。偕祥符朱表唐摹尙書。

帖得之大名。末有金工部印。蓋嘗爲金廷顯仕所得。用以識其藏。前後有六印識。帖中印名。用安陽憲叟。蓋公自稱。使留滄景間。幾半歲。地多蚊蠅。燎煙以熏。其紙半黔。珂嘗攝事淮海。親拜公像。故于慨想尤切。繫贊以傳。庶幾立懦。

贊曰。扶桑擎日。厥幹萬尺。以爲公筆。天壽平格。元圭昭錫。以爲公墨。陰陽闔闢。驚柱立極。見此偉特。太山絕壁。九河碣石。莫動筆力。有雲五色。曾著瑞籍。多士辟易。繫天實啓迪。豈以詡飾。如彼韋陟。公騎鵬翼。歸侍帝側。有是遺蹟。榮光交射。星月珠璧。終古不忒。維珂之得。再拜歎息。塊扎孰測。几几赤烏。尙想公德。永鎮下國。

韓忠獻早夏衆春二詩帖

草書十行

早夏

脫幘吏休後。凭軒風快餘。瀑泉增瀨急。新葉補林疎。暑初天未熱。觀閣進輕涼。果熟愁枝重。荷生覺渚香。

衆春園堂上作

十里溪源注北塘。貯成寬碧澹泱泱。新蒲弱荇參差綠。去鷺來鳧斷續行。一纜輕波搖鷁舸。滿簷斜日曬魚梁。使君思拙無清夢。高柳陰成草自長。

右韓忠獻早夏二絕句。衆春園七言詩。凡三首。真蹟一卷。北塘衆春。皆在中山。塘始于宣徽李公昭亮。園始于公。公之記文。嘗書于皇祐間。今三詩獨不載。安陽集中。蓋刊刻失傳。輯萃弗整。雖前輩不能免。

嘉定甲申二月。得于維揚。其筆法勁正。與公北道京邑二帖。宛然相肖。楷墨又皆一種。益有以驗其真云。

贊曰。五言簡嚴。而意不迫。七言豐腴。而體不忒。意公徜徉于景物之間。所謂造化生意者。蓋亦畢寫于翰墨。如彼纖巧。旬鍛月鍊。又焉得以踐其闢闢。春萌夏假。默具帝力。公詩自然。于以觀德。

富文忠出身帖行書十

弼啓。近小六歸。已曾拜狀。竊計城素。尋達聽覽。仲夏毒熱。伏惟大叔大婦。尊體起居萬福。諸眷聚亦想康寧。此中上下粗且如常。不用憂及。葉郎已成出身。乃與科場一也。諒慰尊抱。諒慰尊抱。正遠趨侍。可量詹仰。暑濕切冀。倍加保愛。少副下情。虔禱虔禱。不備。弼再拜。大叔祕監。大婦郡君。坐前七日。

右兩朝相國。維師韓國富文忠公弼。字彥國。出身帖真蹟一卷。家世寶藏。云得自遂寧守。故監察御史徐詡家。有藏書家之印。傳曰。思其人猶愛其棠。況夫心畫所存。手澤攸寓。凡事業之所形見。功名之所發越。德望之所充積。揆厥繇原。睽于方寸。皆是物也。曷可不傳。茲以昭高山景行之思。

贊曰。其溫而惠。有青州救荒之意。其勁而竦。有北庭抗議之勇。其端而直。有鎮撫百度之績。萃是三德。發爲遺墨。蓋靜而正者。公之心。而用而變者。公之迹。端委搢紳。言乎意親。我思若人。古社稷臣。

文忠烈治裝帖草書七行

彥博啓。知郡承制。久別漸企良深。專介至。辱書感激。感激。末由瞻對。酷暑萬萬保愛。治裝西行。匆匆修報不悉。彥博啓。

右四朝相國、太師平章潞國文忠烈公彥博，字寬夫，真蹟一卷。公以盛德元老，弼亮四世，勦勦彝鼎，壽雋光明，佩天下之安危，極人臣之福履，歸然爲本朝第一。自唐世汾陽而下，未之見也。有是名德，著之翰墨，于後百載，維珂之得三印繫後，傳寶無斂。歲登紹熙，在攝提格，中秋秋夕，遣者羽客。

贊曰：德威堂中有漢相，袞繡畫扶靈壽杖，龐眉鮐背猶克壯，手展炎圖開治象，虹蜺橡筆光萬丈，落紙珠璣爭獻狀，凜然手澤端可仰，三復崧高慰瞻想。

杜正獻與歐公書簡帖

前六帖楷書·後三帖草書·第一帖二十一行·第二第三第四第六帖各十一行·第五帖十二行·第七帖四行·第八帖五行·第九帖六行·

衍啓：此月初上記，爲兵騶輩愆期，直至中旬始行，果塵左右否？方傾想次，忽捧真筆，且審服舍間平常，差慰萬一。衍辱知之深，非有寸長，蓋明主憐其孤直耳。禮遇隆厚，雖則知感，或因染削，曾爲語及，及沐誨諭，莫匪假借，捧玩研味，不覺惴慄，顧自効之不暇，徒且緘祕而已。佩服佩服，衍夏秋而來，支體罷惰，益不如昔，亦年齒使然也。後會無期，可勝悽惻，漸冷動息適變，無至過哀爲祝。謹奉手啓，布謝兼問起居，不宜。衍頓首。永叔龍圖執事。八月二十四日。

衍再拜。龍圖執事：違間半年餘，以真切欽慕之心，則靡日不思矣。弟罷茶，不時寓書尺爲問耳。執喪又經冬，奉几筵外，伏計順變少安。祝史昆仲道長，衍比別時又衰，自餘不欲縷述，委順而已。凝寒惟保護是祝，不宜。衍手啓再拜。十一月九日。

衍頓首。永叔龍圖公：卓遠出書，伏審執喪盡禮外，體候如常，頗慰經年之別思也。衍老態病容，日有加矣，未知爲會之計。歲晏惟若時適變爲禱。謹奉手啓起居，不宜。衍頓首。蜡前一日。

衍再拜。昨日蒙枉高軒。久陪清論。莫匪庇民之畫。罔知更僕之勞。歎服彌多。感媿兼至。比期謁謝。尋辱誨言。猥念衰羸。不校往復。雖認厚意。可喻覲顏。謹奉手啓。以代面述。不宜。衍悚息。上留守學士鈴下。十三日。衍啓。浹日之間。旌騎再至。諭以誕節。燕設俾預坐末。雖名交游。語乎分義。則天倫無異。止爲衰罷。不應來教。然承見諒。終負惕息。須當翌日前詣訪也。詩奉手啓代意。不宜。衍悚感頓首。留守龍圖閣下。申刻。衍拜手。衍前日上記。以拜賜感懼間。殆不成文。方悚息未已。猥貽真筆。褒假非汪汪之量。何以少安。佩紉佩紉。連日賓榻駢集。匪易。尤喜寢饋彌裕。差慰傾想。俟暇謁候次。謹奉手啓述謝。不宜。衍頓首。留守龍圖鈴下。二十五日。

希文猶在彭門。或聞疾勢未解。深可憂也。彼中必得的信。早晚到任。希文英奇挺特。百身莫贖。非鴻筆麗藻。何以旌其封樹。明公卓然高識。許卽爲之銘。亦亡者稽德之有感召也。聞之使人感慨何已。衍再拜。蘇集編次審已畢事。非大君子藻尙素異。何以及是。存沒增感矣。行狀鄉亦封納。未知此家子孫。胡以爲報也。同感同感。襄事實日。早希密示。千萬顯俟。顯俟思渴思渴。衍上。

右杜祁公墨蹟。公當景祐中。爲御史中丞時。余亦鎮南軍掌書記。爲館閣校勘。始登公門。遂見知獎。後十五年。余以尙書禮部郎中。龍圖閣直學士。留守南都。公已罷相。致仕于家者數年矣。余歲時率僚屬候問起居。見公福壽康寧。言笑不倦。歲餘。予遭內艱去。居于穎。服除來京師。蒙恩召入翰林。爲學士。與公書問往還無虛月。又二歲。公以疾薨于家。余旣泣而論次公之功德而銘之。又集在南都時。倡和詩爲一卷。以傳二家之子孫。又發篋得公手書簡尺歌詩。類爲十卷而藏之。余與時寡合。辱公之知。久而愈篤。宜于公。

有不能忘矧公筆法爲世楷模人人皆寶而藏之然世人皆莫若余得之多也嘉祐八年六月晦日楷書

右慶歷宰相司徒祁國杜正獻公衍字世昌與歐公書簡帖九幅真蹟一卷帖後有參知政事六一先生歐陽文忠公脩跋二公本同仕仁祖朝德業文章先後相望而推尊景慕乃如此益信所說不自高故能成其高非虛言也帖藏歐陽氏故有十卷今存者惟此上有印識三十二文忠名印一又有建炎諫院印在卷末當是轉入藏書家有居是官者後復入丞相京魏公鏜第其子司農簿沆貳郡九江暇日出名帖相示因得以他畫易真祕笈實嘉定己巳歲六月

贊曰厚德如祁公黃鐘大鏞和樂且雍尊賢如六一朱絃疏越三歎廟瑟道比志叶不膠而漆顧中外之雖異猶同堂而合席思遺蹟而不可見幸二賢之爲時出所以前乎此則致太平之明效後乎此則贊受遺之定冊旣以廣元氣之運亦以壽斯文之脉然則湍瀨無縱鱗風枝無寧翼涵養成就見此輔弼故後世尤得以歸功于慶歷也

孫威敏及物帖

行書十
八行

沔啓奉別踰紀疏闊附問企渴何言人至承惠字及著文足見智者用心之遠而思功及物也嘆服才識故非一日矣沔居憂三四年臥病自今春來方有生意朝廷不知累被恩命切切辭免未能決去又此重任本差來江西湖南撫慰士民中途改往廣南衰病之質惟憂瘴癘增舊疾不能保天年何暇賊盜爲已三次上章求免未蒙允許必須至勤切期于得請矣觀足下之文病者安敢承當也此事不免與余楊同

其道矣。少年時無病，尚可驅策。如今何爲何爲？冬寒保愛保愛，草草奉聞，不宜。河上新除簽寺丞仁弟，十一日狀。

右至和樞密副使、觀文殿學士、兵部尚書孫威敏公沔，字元規，及物帖真蹟一卷。按國史：皇祐四年夏四月，廣源州蠻儂智高反。八月辛卯，公自新知秦州，改湖南、江西安撫使，入內押班。石全彬副之，公行至鼎，加廣東西安撫使。九月庚午，命狄青宣撫，而公副之。越明年正月戊午，遂敗智高于歸仁鋪。五月丁未，公登樞筦，攷是帖乃在四年之冬。所謂余楊蓋知桂州提舉兵甲余靖同知諫院廣東西體量安撫使楊敞俱以經制無功被降謫者。開禧丙寅八月，予在京口彙名帖，得此于金壇一名家。蓋與孫氏有連，傳寶其真云。

贊曰：有文事，有武備。公之筆札，蔚然可占也。兵凶器，戰危事。公之此事，非直一謙也。以公之才，持必勝之策，而于顧慮獨如此其嚴也。嗟今之人，萬不一逮。談伊吾，望天山，乃抵掌而奮髯也。爾言則輕，民之殲也，好謀而成，視吾盍也。

歐陽文忠索碑遷居二帖

並行書：第一帖十一行，尾批四行；第二帖八行。

昨承見索碑陰題刻，今已勉強多難衰退，文無次第，不足以道述盛德。多媿媿，汴渠已淺阻，舟行不通。郡齋甚靜，又得君謨一二餅新茗，恨無知者一啜爾。安撫不久，應當到彼，寂不聞其有所爲，恐知之見許，碑文不知何時可去。請幸留意，恐公旦夕有新命耳。已寒保重，不宜修再拜。碑陰如刻石時，前後勿加題，并官銜並不要。其中亦要題空起，只明天子一處空，其餘不要空也。貴稍近。

古恐知。

修啓公私多故。無由少奉閒燕。惟深企仰。秋寒喜承體氣清安。敝居安敢爲久計。嚮以小姪孤幼。一房新來。遂欲遷一寬處。旣而賃得旁舍數間。遂且不移。苟度時日。若獲脫去。謹專如教也。人還聊此不宜。修再拜通直內翰執事。二十六日。

右治平參政太子少師歐陽文忠公修字永叔索碑遷居二帖真蹟一卷。予贊率更及杜祁公帖。嘗敍公跋矣。雄文直節如公者。獨未特表出于籤牋間可乎。近世傳公帖多楷書。頗未見行體。今首帖清逸絕俗。如神仙中人。擁絳旌。鳴翠旂。下上乎九光三晨之表。次帖端雅蘊藉。如逢掖之子。鏗希瑟。書垂紳步趨乎杏壇槐市之間。兼二妙之能事。揭千載之傳信。幾世幾塵。固可望而不可卽也。一以寶慶元日得之金沙朱翌亮父有舊印識三。一以是歲五月得之歷陽張汝昭無印識。

贊曰。公于率更每稱吾家是書之傳。似耶非耶。書出于心。旣勁且方。世多公書。行或未藏。易方而圓。飄飄若仙。楷以某人。行以其天。堂堂斯文。維軻與雄。我觀二書。如或見公。

唐彥猷談奉得達二帖

並行書十三行。第一帖尾批四行。第二帖尾批一行。

詢啓。昨者經途。幸得談奉。迫于行邁。不能從容。仍煩出郊。足見勤止。別來動息如何。介至辱書。并示佳什。獎愛之厚。曷以克勝。續當繼和。少酬淑貺。衰拙無狀。方臨劇郡。或有所聞。幸冀見諭。秋涼自愛。不宣。詢頓首。十二兄。二十九日。

杭醞不佳。輒送木蘭二十四器。以爲重九一醉之賞。二郎謝書。三郎不見薦名。更宜寬勉。尊嫂萬福。九姊

同此。

詢啓近元昆虞部行曾奉書想尋得達左右暑濕不審哀慕之外動止無爽姑蘇自月初卽淫雨相仍民田頗以爲苦今尙未霽不知餘杭何如吳中卑濕殊可患兼往往因此爲疾吾兄憂居且踰年久寓于杭還粗安否咫尺不能面奉徒勞引領餘宜自重不宜詢再拜正叔國博五月二十三日貴眷各想平暢

右治平翰林侍講學士判太常寺唐公詢字彥猷談奉得達二帖真蹟一卷今祕閣羣玉堂帖嘗有公書以此帖較之真出一手蓋奇筆也帖具藏書家大小九印首帖得之錫山次帖得之上饒一士友家皆嘉定癸未歲按國史公始以任進繼賜奉常第徧歷清華才學簡于昭陵朱長文續書斷所謂筆迹逾媚繁之能品六十六人中又謂行書學歐體殆非誣也

贊曰公于國史以好硯稱石焉取斯蓋協其能適媚之觀在此尺紙善工利器予鑒如此

曾宜靖類見帖楷書八行

公亮啓啖違未幾傾詠良深訊介茲來書函垂貺遠迂勤禮彌切感悚方卜首塗祇修類見卽諧披觀預積欣愉秋氣未平公餘善愛謹復手書爲謝不宜公亮拜啓鹽倉判官左右

右三朝相國維師魯國曾宜靖公公亮字明仲類見帖真蹟一卷亞勳之篆侑食之典熙寧之詔維見可觀相業所存固毋庸以詞贅也慶元丁巳四月予侍親在閩得于泉之好事家蓋公桑梓云

贊曰公在嘉祐輔政受遺如畢公高勳烈堂堂奉同而隳也公在治平清淨畫一如曹相國德心休休

比規之隨也。公在熙寧，功成身退，如裴中令，壽雋番考，樂以全其歸也。帖字宛然，既莊而復奇也。周密無間，筆法絲此推也。予得而藏，尙可以想麒麟之英姿也。

趙清獻動潔帖

行書
四行

節之戶曹，暑極安否。日來秋賦如何，恐十一月初歸長沙，提舉懿州城寨，必恐霑恩，茲可喜爾。光景如箭，千萬勤潔自重。至禱。至禱。七月十二日，抃白。

右熙寧參政、太子少師、趙清獻公抃字閱道，勤潔帖真蹟一卷。公有惠于蜀，西州人多寶遺墨。先君漕潼川，得此帖于小溪文氏，不記歲時。

贊曰：爲御史而稱以鐵面，宜筆力之健；尹成都而琴鶴以行，宜字體之清。書法何出，心卽其物。可以比魏公之笏。

寶真齋法書贊卷十一

宋名人真蹟

王文公赴官修學二帖

第三帖行書七行·第二帖行書十一行

安石啓。承誨累幅。豈勝感慰。初謂優游園宅。足慰親懷。乃知營從赴官不久。煩暑尙在。冀倍自調。嗇令兄想侍奉佳福。安石啓。推官足下。

吾在此粗如常。得弟書喜安佳。歲莫豈勝憂想。不知行李何時至此。日以企佇。切好將息。累得十姪書。切有便更寄書來也。十四十六念一等孫。安佳。思憶思憶。十五切修學。有便寄書來也。六弟日夕往來。七八姪十一姪常相見。諸不一一。思憶思憶。押送七弟。

右熙寧宰相、維師荆國王公安石、字介甫、赴官修學二帖。真蹟一卷。士所患無學問、無氣節、無望實、無力量、以達其志、以得乎君、以澤乎天下、以被乎後世、公蓋兼而有之、而又遇有爲之主、伸可爲之願、顧其效獨反是、予每竊慨歎。嘉定乙卯之十月、言登鍾山、其麓有隱君子焉。卒然問公之爲人。答曰。如其字札退而訪遺墨。又一年而得之。僅致數帖。熟復有感。因重歎曰。是隱者其知言歟。

贊曰。態騰踔而多疏。意軒昂而多趣。倏焉如薈電之駒。沛然如縱壑之魚。使之爲山澤之癯。抱是道以自娛。聞清風而興起。望膏澤之沾濡。膚寸所形。批糠金朱。豈不毅然大丈夫。然而律之以芝繇之法度。攷之以義獻之範模。婢行楷而已變。質隸草而多拘。顧欲以之擅八體。教六書。合天下同軌之車。而不